



PROCESVERBAL

Nga mbledhja e rregullt e kuvendit komunal të Rahovecit, e mbajtur më **28.10.2022**, me fillim në ora **10:00**. Mbledhjen e kryesoi: Kryesuesi i kuvendit z.**Defrim Kafexhiu**. Konstatohet se kuorum për mbajtjen e mbledhjes kemi.

Kryesuesi – Fillimisht më lejoni të ju përshëndes, i nderuar nënkryetar i komunës z. **Fatmir Iska**, të nderuar kuvendarë, drejtorë të drejtorive komunale, të nderuar qytetarë të komunës së Rahovecit, kjo është seanca e dhjetë për këtë vit kalendarik.

Atëherë KPF në mbledhjen e mbajtur më 19 tetor 2022 pas shqyrtimit të pikave të rendit të ditës që janë propozuar nga kryesuesi i kuvendit në koordinim me kryetarin e komunës, ka propozuar këtë rendi dite me 13 pika:

REND DITE

RAHOVEC / ORAHOVAC

Njësia Nr./Br./No 01 (Kuvendi i Komunës)

Nr./Br./No 01/22 Nr. i faq./Br.str./No.pg 390

Data/Datum/Dat 28 / 11 / 2022

1. Shqyrtimi dhe miratimi i procesverbalit nga mbledhja e kaluar;
2. Pyetjet dhe përgjigjet në pyetjet e kuvendarëve;
3. Shqyrtimi dhe miratimi i propozim vendimit për dhënien e pëlqimit për këmbimin e pronës komunale me pronë private për interes publik;
4. Shqyrtimi dhe miratimi i projekt statutit të QKMF-së;
5. Shqyrtimi dhe miratimi i propozim vendimit për ri-destinimin e mjeteve financiare nga buxheti i vitit 2022;
6. Shqyrtimi dhe miratim i vendimit për miratimin e projekt planit për trashëgimi kulturore 2022-2025;
7. Shqyrtimi dhe miratimi i vendimit për caktimin e normave tatimore për tatimin në pronën e paluajtshme për vitin 2023;
8. Shqyrtimi dhe miratimi i vendimit për miratimin e planit komunal për menaxhimin e mbeturinave 2022-2027;
9. Shqyrtimi dhe miratimi i vendimit për miratimin e programit komunal tre vjeçar për banim 2022 – 2025;
10. Shqyrtimi i raportit financiar për periudhën janar – shtator 2022;
11. Informatë për përgatitjen e vitit shkollor nga DKA-ja 2022/2023;
12. Shqyrtimi i raportit të performances komunale për vitin 2021;
13. Shqyrtimi i raportit të Zyrës së Auditimit të Brendshëm për vitin 2021 dhe diskutimi i planit të veprimit;

Kryesuesi – Atëherë ky është rendi i ditës për sot, nëse dikush ka diçka për të thënë?...

Burim Krasniqi – Faleminderit kryesues, përshëndetje ekzekutiv, asambleistë dhe të gjithë të pranishëm në këtë seancë. Në KPF e kam shprehur shqetësimin rreth raportit të zyrës së auditimit të brendshëm. Është një shkresë me dy faqe, nuk është raport. Në KPF kemi diskutuar edhe me nënkryetarin dhe në një farë forme erdhëm në seancë me një pajtueshmëri që duhet të jetë i bashkangjitur edhe raporti i auditorit të brendshëm. Unë nuk jam duke insistuar në këtë, me qëllim që performanca e komunës të dal keq, absolutisht çdo dokumentacion që duhet të shqyrtohet në asamblenë komunale e që komunën e Rahovecit e nxjerrë mirë në grantin e performancës jam i gatshëm ta mbështes tutje, por ky nuk është raport i auditorit – është informatë dy faqe. Si të tillë nuk mendoj që duhet të vazhdoi tutje në asamblenë komunale dhe kërkoj që pikën e 13-të të rendit të ditës ta shtyejmë për seancën e radhës dhe të shoqërohet bashkë me raportin e auditorit të brendshëm ose së paku raporti i auditorit të brendshëm të jetë në web-faqe sepse deri sot nuk është as në web-faqe të komunës e as nuk n'a është prezantuar neve si asamble komunale. Nuk besoj që ka aq të gjetuara sa që duhet t'i fshehim, ndoshta është neglizhencë dhe besoj që nuk është në rregull dhe goxha ofenduese për asamblenë me këtë shkresë dy faqe. Kërkoj të vendoset në propozim që kjo pikë të shtyhet për seancën e radhës që të vjen edhe raporti, pa dashtë të paragjykoj asnjë gjë në këtë drejtim.

Nënkryetari – Faleminderit i nderuar kryesues, të nderuar kuvendarë, përshëndetje për të gjithë të pranishmit. Tek pika e 13-të; shqyrtimi i raportit të zyrës së auditorit të brendshëm, në KPF kemi thënë që kërkohet një kriter rreth performancës komunale, sa i përket grantit kjo nuk ka ndikim, aty ndikim ka vetëm raporti i zyrës kombëtare të auditorit të jashtëm rreth fitimit të grantit. Përndryshe raportet e zyrës së auditorit të brendshëm nuk publikohen për aryes ligjore, ka pengesa ligjore dhe nuk kemi të drejtë t'i publikuar. Përndryshe secili prej jush që është i interesuar hiç pa çasje në dokumente zyrtare, mund të vie çoftë në zyre të kryetarit, nënkryetarit, të njësisë së auditimit të brendshëm t'i shoh të gjitha raportet e auditorit që i auditon drejtoritë dhe rekomandimet që iu jep, por edhe planet për zbatimin e rekomandimeve që iu japin drejtorive përkatëse. Ju jeni kuvend, nëse dëshironi ta vendosni ë votim për ta shtyrë për seancën tjetër, kryesuesi ka të drejtë ta vendos në votim, por unë iu ftoj të gjithëve që këtë pikë ta diskutoni për arsye të performancës komunale, sepse këtu jemi bashkarisht pavarësisht a jemi ekzekutiv apo legjislativ. E ftoj kryesuesin ta vendos si pikë të rendit të ditës, diskutohet si raport dhe ju ftoj që ta përkrahni për arsye të performancës komunale që kërkohet si kriter. Skenderi këtu është pjesë e grupit të performancës, mundet t'iu sqaroj më saktë arsyen se pse kjo kërkohet.

Burim Krasniqi – Nënkryetar, nuk e di pse duhet të shkojmë në zyre të kryetarit ta kërkojmë një raport i cili do të shqyrtohet sot dhe është dashur t' vie asambleistave?... Pa marrë parasysh formën e performancës, nuk tentojmë ta pengojmë. Unë e kam një pyetje ndryshe, a e vlerësoni si raport këtë shkresë?...Nuk është raport, është shkresë. Raporti i njësisë së auditimit të brendshëm është krejt ndryshe, për mua dhe për grupin e asambleistave të LDK-së nuk është raport.

Nënkryetari – Edhe një herë po e përmendi, është obligim ligjor që kjo të jetë si pikë e rendit të ditës, përndryshe për neve është raport dhe ky raport është bërë mbi bazën e një plani vjetor që e ka njësia e auditimit të brendshëm. Secili mund ta trajtojë si të don; raport, shkresë, informatë por unë e ftoj ushtruesin e detyrës së njësisë së auditimit të brendshëm z. Kabashin, nëse ka diçka për të thënë lidhur me këtë çështje.

Kryesuesi – Faleminderit, këtu vetëm një problem po e shoh, te pika e rendit të ditës si e fundit d.m.th vetëm ndryshimi i emërimit (informatë e zyrës së auditimit), përndryshe si propozim i një anëtarit të kuvendit unë do ta vendosi në votim. Atëherë pikën e 13-të të rendit të ditës sipas propozimit të Burim Krasniqit po e vendosim në votim për shtyerje për në seancën tjetër të rregullt, me çrast ky raport ose do të plotësohet ose do të ndryshohet emërtimi dhe të cilësohet si informatë. Kush është “për” shtyerjen e kësaj pike për në seancën tjetër?... Kundër?... Abstenim?... 11 vota për, 11 kundër dhe 1 abstenim. Atëherë kjo pikë e rendit të ditës shtyhet për seancën tjetër, po e shfrytëzoj votën e dyfishtë. Atëherë rendi i ditës për seancën e sotshme i ka 12 pika, po e vendosim në votim si të tillë miratimin e rendit të ditës; Kush është për?... Kundër?... Abstenim?... Me 15 vota për, 11 kundër, miratohet rendi i ditës me 12 pika. Vazhdojmë me pikën e parë të rendit të ditës;

1. Shqyrtimi dhe miratimi i procesverbalit nga mbledhja e kaluar;

Kryesuesi – A ka dikush prej anëtarëve të kuvendit lidhur me procesverbalin nga mbledhja e kaluar?... Nëse jo, atëherë po e vendosim në votim, kush është për miratimin e procesverbalit?... Me shumicë unanime miratohet procesverbali i mbledhjes së kaluar.

2. Pyetjet dhe përgjigjet në pyetjet e kuvendarëve;

Edona Kryeziu – Përsëritje, faleminderit për mundësinë e fjalës kryesues, të nderuar të pranishëm, kolegë kuvendarë. Unë sot po iu drejtohem në emër të banorëve të fshatit Nagac, fshat ky i lënë pas dore sipas banorëve dhe vizitohet vetëm në kohë fushate. Në këtë fshat nuk është investuar asnjë cent për kanalizim, i gjithë rrjeti i kanalizimit që është i ndërtuar në këtë fshat nga ana e banorëve është pa kurrfarë kriteri e që është një pamje e tmerrshme në shekullin 21. Para dy viteve është vë gurthemeli i rregullimit të shtratit të lumit, në të cilin është paraparë të instalohen disa kolektorë për grumbullimin e rrjedhave të kanalizimit, e kuptojmë që rregullimi i tyre është i domosdoshëm për çdo lokalitet, mirëpo për këtë fshat është mjaftë jetik. Pothuajse të gjithë janë në dijeni që në këtë fshat është investuar shumë herë me participim sidomos tek shkolla fillore në faza të para të ndërtimit. Konsideroj që të bëhet edhe zgjidhja e këtij problemi me participim nga banorët, atëherë është e papërbalueshme. Unë po iu drejtohem në emër të tyre, kërkoj nga drejtorja përkatëse që të bëhet një zgjidhje sa më e shpejtë dhe kur mund të presin banorët zgjidhjen e këtij problemi?...

Sejfullah Sejfullahu – Përsëritje për të gjithë, nënkryetar, drejtorja, kuvendarë. Ditë më parë ose më shumë se një muaj, në të përditshmen dhe mjaftë të lexuarën “Vecernje Vijesti” është dhënë një deklaratë ose informata apo sulm që iu është bërë verërave dhe vreshtarisë tonë. Prej pesë verërave të testuara të Kosovës, katër prej tyre kanë rezultuar fals. Ajo që më preokupon mua është heshtja jonë edhe pse nuk po them që ndoshta i kemi të gjitha kompetencat që t’i kundërvihemi ose t’i padisim, por kjo heshtje nuk është e mirë as e jona as e agjencisë së ushqimit dhe veterinarisë e gjithashtu as e ministrisë së bujqësisë rreth këtij sulmi që është bërë. Të gjithë e dijmë që verërat tona janë më të mirat në rajon të vlerësuar nga gazetarë, presidentë, ambasadorë të gjithë i kanë cilësuar si më të mirat. Ky sulm është shumë i dëmshëm dhe nuk e di si duhet të reagojmë. Kroacia është shtet mik i joni, por a lejohet një sulm i tillë që për interesa të ngushta të vendeve të ekonomisë të rajonit të na bëhet neve. Të gjithë e dijmë që është një kamuflim, shantazh apo një luftë ndaj verës tonë. Ftoj kryetarin, nënkryetarin dhe juve kryesues që ta shikoni bazën ligjore dhe në fund nuk është turp edhe t’i padisim. Mendoj që duhet të reagojmë, i kam shfletuar të gjitha portalet e rajonit dhe nuk ka vend që nuk është shpërndarë dhe nuk ka reflektuar kjo informata prandaj ju ftoj që ta mbrojmë prodhimin tonë. Po thonë ka qenë “sheqer dhe ujë” si konsumues i rregullt i verës së Rahovecit, ose unë do ta merrja “sheqerin” ose askush, para tre dite e kam matur sheqerin, 5.8 e kam. Pres reflektim prej organeve.

Lirigzon Kastrati – Faleminderit kryesues, nënkryetar, drejtorë të drejtorive, kolegë asambleistë. Realisht kam dy pyetje, për ekzekutivin dhe kryetarin më konkretisht. Para dy jave është nënshkruar një memorandum mirëkuptimi me ministrin e Mjedisit dhe Planifikimit Hapësinor për një projekt kryesor për këto pesë fshatra; Brestoc, Hoçë e Vogël, Nagac, Krushe e Madhe, Hoçë e Madhe. Projekti është nënshkruar në vlerën prej 60.000euro. Nuk e di për çka janë paraparë këto mjete, por mund të them që me 60.000euro mund të bëhet vetëm ndonjë pastrim të këtij lumi edhe pse është nevojë esenciale të bëhet edhe pastrimi. Një çështje tjetër është prapë në fshatin Brestoc; Kur e kam pyetur kryetarin lidhur me rrugën në fshatin Brestoc, ai është përgjigjur që është kompetencë e ministrisë së Mjedisit dhe Planifikimit Hapësinor. Kryetarin ose drejtorin desha ta pyes; A e ka diskutuar çështjen e shembjes së rrugës në fshatin Brestoc, e cila është bërë e rrezikshme për banorët dhe për njerëzit që lëvizin në atë pjesë.

Besmire Bytyqi – Faleminderit kryesues. I nderuar nënkryetar, drejtorë të drejtorive, kolegë asambleistë. E kam një pyetje, duke qenë që jemi në muajin tetor – muajin e ndërgjegjësimit kundër kancerit të gjirit, e kemi parë lajmin që mamografia këtë muaj do të jetë falas, ndërsa interesi i grave të komunës sonë ka qenë jashtëzakonisht i madh. Duke qenë se në QKMF nuk kanë arritur t’i përfundojnë të gjitha ato gra që janë lajmëruar me terminet e tyre. Pyetja është; A do të vazhdohet edhe muajve të ardhshëm të jetë pa pagesë derisa lista e grave që kanë bërë termin të përfundojë?...

Burim Krasniqi – Faleminderit edhe një herë kryesues. Deshta të bëj pyetje të ngjajshme me Besën, por po e them pak më ndyshe. Është fakt që është muaji i vetëdijësimit ose ndërgjegjësimit të grave për luftimin e kancerit të gjirit dhe është fakt që ka ekzistuar një postim në fb si ftesë për të shkuar gratë ta bëjnë mamografinë. Fakti i dytë është që për dy javë tjera pas kësaj nuk ka punuar mamografia, pse?... Sepse

operatorit që e bën mirëmbajtjen e saj, komuna ia ka pasur 30.000euro borgj (nëse nuk gaboj) dhe nuk ka ardhur për servisim. Prej datës kur është bërë postimi në fb, në cilën datë është mamografia e parë?... Në atë ditë ose të nesërmen a ka pasë mamografi?...Jo, sepse nuk ka punuar, e kam me argument, bile të njëjtën kohë nuk ka patur as film për rengën. Për dy javë pacientët janë kthyer sepse nuk ka film të rengenit. Drejtor i financave, po të kërkoj miqësisht që të jem të kujdesshëm te pjesa e shëndetësisë sepse nuk guxojmë të mbesim në obligime e qytetarët të “zhagiten” që për shkak mospagesës së obligimeve nuk arrijnë t’i kryejnë këto shërbime. Një shqetësim tjetër edhe pse drejtoresha e shëndetësisë nuk qenka këtu, pse nuk punon pajisja e rengenit kur nuk ka rrymë?... Me sy të mi e kam parë që pacientët kthehen me arsye që gjeneratori nuk e vë në funksion rengenin!. Kërkoj ta gjejmë mirëkuptimin ose ta bleni një gjenerator tjetër që është i aftë t’i vë në funksion të gjitha pajisjet komplet të QKMF-së në Rahovec që qytetarët tanë kurdo që vijnë t’i kryejnë shërbimet e tyre. Në KPF e kam bërë pyetjen rreth buxhetit dhe çështjes së furnizimit me lëndë djegëse. Në këtë drejtim i kam dy pyetje; E para, sasia e kontraktuar e lëndës djegëse, a është ajo që është kërkuar prej shkollave dhe a e mbulon furnizimin me lëndë djegëse për të gjitha shkollat, për të gjithë periudhën mësimore që do të zhvillohet, duke patur parasysh që do të ketë mësim më gjatë sesa herave tjera gjatë dimrit. E dyta, kontrata a është një vjeçare apo më shumë, duke patur parasysh që sivjet e kemi një vit specifik ku çmimi i lëndëve djegëse është 200% më i shtrenjtë. Është ndërprerë një kontratë me operatorin e njëjtë për shkak të ndryshimeve në çmim e që është logjike dhe normale, por në çoftëse është ndërprerë kontrata sivjet për shkak të rritjes së çmimeve besoj që nuk bënë me qenë më shumë se një vjeçare kontrata e furnizimit me lëndë djegëse sepse dëmton direkt buxhetin e komunës. E kam bërë një pyetje për drejtorin e DKA-së rreth konkurseve me gjysëm normë dhe nuk kam marrë kurrë përgjigje, shpresoj që nuk e keni lënë në harresë dhe shpresoj që në seancën e radhës ta kemi informatën.

Melinda Oruqi – Përshëndetje për të gjithë, te unë janë ankuar shumë qytetarë. Rruga në dalje të Rahovecit, përkatësisht shtegu i ecjes te pjesa e quajtur “Zhdredhë”, kam qenë edhe personalisht i kam bërë disa foto aty dhe ajo rrugë është shëndërruar në një tmerr nga vërshimet e shiut. Zakonisht gjatë vikendeve aty dalin shumë familjarë për të ecur. Kërkoj nga drejtorja e Shërbimeve Publike ta riparoj këtë shteg.

Vlora Vuçitërna – Faleminderit kryesues, përshëndetje për të gjithë. Kohëve të fundit po shohim vetëm projekte për sheshe, së fundmi edhe një shesh tjetër në lagjen time i emërtuar si “Sheshi i Republikës” shpresojmë që këtë projekt do të përfundojnë mirë dhe së shpejti. Unë si prind dhe prindërit tjerë e kemi një brengë tjetër sepse në një ditë vikendi nuk kanë ku t’i dërgojnë fëmijët për disa orë për aktivitet dhe rekreacion. Jemi në dijeni se te Maja e Shkodranit janë vendosur disa lodra, mirëpo duhet pasur parasysh që jsecili e kemi atë mundësi t’i hipim makinës e të shkojmë deri atje lartë. Nënkrëtar, po iu drejtohem juve, meqenëse kryetari nuk është këtu; A planifikoni së shpejti ndonjë projekt për fëmijët tanë, apo do të ende me projekte për sheshe?... E dyta; Kësaj here e kam një kritikë për drejtorinë e arsimit. Drejtor, nuk e di a jeni duke dalur për vizitë në shkollat e qytetit apo jo, mirëpo meqenëse shkollat janë edukativo-arsimor, mendoj që pastërtia duhet në nivel maksimal. Kërkoj falje që duhet të shprehem kështu, por momenti i hyrjes nëpër objekte të shkollave në qytet ta jep ndjenjën që je në një toalet publik. Mendoj që drejtorja e arsimit duhet të merr masa çoftë me stafin që është, çoftë edhe të shtoj numër të stafit për mirëmbajtje të pastërtisë.

Merisa Sharku – Përshëndetje për të gjithë. Po i drejtohem së pari drejtorisë së urbanizmit; Kemi kërkesë për reagim nga komuniteti i arkitektëve të komunës sonë; Gjatë aplikimit për leje ndërtimore, përgjigja po bëhet e tejzgjatur në kushte ndërtimore, kjo kërkesë vjen drejtpërdrejt prej arkitektëve. Disa herë më parë e kam cekur që qytetarëve duhet t’i bëjmë stimulim për të marrur leje ndërtimore, në këto raste kur po ndodhin këto zhagitje, demotivohen për aplikim për leje ndërtimore. Në emër të arkitektëve po bëj thirrje për reagim, përgjigjet për kushtet ndërtimore dhe leje ndërtimore të vijnë më shpejtë. Pika tjetër që dua të lidhem është ajo për “Sheshin e Republikës”; Vlora e ceku që po bëhen shumë sheshe, po e potencoj që më mirë mos me u bë një punë, sesa të bëhet në mënyrë të gabuar. Reagimi që ka qenë për në sheshin në qendër me arsyen që është dashur të konsultohemi me ekspertë më detajisht rreth projektit, e tash përveç që nuk ka patur asnjë konsultim për këtë shesh, këtu po ndodhin edhe krime!. Nuk e di sa jeni të informuar, por të rrënohet trashëgimia

kulturore të një qyteti është krim. Aty qytetarët e dijnë që ka qenë kroi i vjetër i qytetit, këtu reagim ka patur prej përgjegjësve të trashëgimisë kulturo – historike të Rahovecit (ish- përgjegjësve). Ata kanë bërë kritikë dhe reagim të ashpër për këto krime që po ndodhin në këto pjesë të qytetit. Trashëgimia duhet të ruhet – jo të rrënohet, më mirë mos e bëni një punë sesa të rrënohet.

Nënkryetari – Faleminderit kryesues. Pyetja e fundit, projekti “Sheshi i Republikës”; Është e vërtetë që ka filluar aty një projekt, është shumë i mirë, dikush mendon që është shumë i mirë e dikush tjetër jo. Për të gjitha krimet që mendon dikush që janë bërë në ekzekutim të projekteve, janë organet tjera që mund të i drejtohet secili prej juve, i ftoj edhe qytetarët tjerë t’i bashkohen kësaj. Ndoshta ka pasë deklarata që tani po i marr vesh, rreth rrënimit – demolimit të kroit të vjetër gjë që nuk është e vërtetë, kroi bashkë me “koritën” e vjetër janë aty. Do të kujdesemi që edhe ujin ta sigurojmë dhe kjo “qeshme” të jetë funksionale. Pyetja e dytë, te kushtet ndërtimore dhe lejet ndërtimore; ju ftoj të gjithë juve t’i ftoni njerëzit të marrin leje ndërtimore dhe ju siguroj që drejtoria e urbanizmit do të përgjigjet në afatet ligjore që janë. Tek asambleistja, znj. Vlora Vuçitërna rreth projekteve të rekreacionit për fëmijë, edhe unë jam prind dhe i kuptoj këto gjëra. Investimet ndodhin prej komunës, a janë të mjaftueshme? Ju siguroj që jo, mirëpo kemi projekte, janë rregulluar disa parqe që mund të frekuentojnë fëmijët, ndoshta kemi mungesë të përgjithshëm të trajtimit të atyre parqeve në kuptimin e demolimit të prishjes pa arsye. Te asambleistja Melinda Oruqi Iska rreth shtegut të ecjes që është demolu nga vërshimet, komuna ka projekt dhe do të bisedojmë dhe ta shohim se çka mund të intervenojmë për sivjet. Te asambleisti Burim Krasniqi rreth mamografisë dhe muajit të vetëdijesimit; Është e vërtetë që mamografia është prishë është aparat dhe aparatet prishen, mirëpo të nesërmen menjëherë është rregulluar problemi dhe ka vazhduar puna me mamografi dhe aq më mirë ku edhe të shtuneve ka vazhduar puna. Te furnizimi me lëndë djegëse nëpër shkolla; Është e vërtetë që ka qenë një kontratë dhe është prishur, ju e dini se çmimet janë rritur dhe të gjithë i kuptojmë këto gjëra, është lidhur një kontratë e re dhe furnizohen shkollat mbi bazën e kërkesave që i kanë. I ftoj gjithë drejtorat e shkollave që mos t’i pranojnë lëndët djegëse nëse nuk janë në metrazhë mbi bazën e kërkesës që është kërkuar dhe nënshkruar. Te asambleistja Besë Bytyqi, mamografia të jetë pa pagesë. Në këtë muaj të ndërgjegjësimit është pa pagesë. Bisedova edhe me drejtorin e QKMF-së Albunitin dhe kjo tarifë prej 5euro është e paraparë me udhëzim administrativ, do të kujdesemi nëse eventualisht ekziston ndonjë mundësi me vendim të kryetarit, çoftë edhe me vendim të kuvendit unë jam për që të lirohen nga kjo taksë secili pacientë që trajtohet me mamografi. Te asambleisti Lirigzon Kastrati, rreth memorandumit që është nënshkruar prej ministrit të Planifikimit Hapësinor dhe kryetarit të komunës për projektin e rregullimit të lumit Hoçë e Madhe – Krushë e Madhe. Projekti është lidhur me dy llote në vlerë prej 1.294.000 ndërsa memorandumit është nënshkruar vetëm për 60.000euro dhe këto janë mjete që të shpenzohen vetëm për këtë vit. Punët kanë përfunduar 20%, është projekt i ministrisë dhe jo i komunës. Te pyetje tjetër, në Brestoc – rruga që paraqet rrezik, unë vet kaloj aty, prapë është kompetencë e ministrisë dhe nuk ka të drejtë komuna të investoj pavarësisht rrezikut. Ne iu kemi drejtuar ministrisë së infrastrukturës shumë herë që ta trajtoj këtë problematikë e cila sinjerisht paraqet rrezik. Tek asambleisti Sejfullah Sejfullahu rreth artikullit që po qarkullon në lajmet dhe portalet tona. Nuk e di sa jemi kompetentë ne të reagojmë përderisa i kemi institucionet qëndrore respektivisht ministrinë e bujqësisë. Ne po se po, krytari i komunës gjithashtu por është ministria e bujqësisë, është një shoqatë e verëtarëve, është një institut atje që është dashur të reagoj së pari dhe më pas kryetari i komunës që i mbron interes e bizneseve që operojnë në territorin e komunës tonë. Besoj që ke të drejtë dhe besoj që artikulli ka qenë tendenciozë për shkak të interesave të disa bizneseve që afrojnë në Kroaci. Tek asambleistja, zonjusha Edona Kryeziu rreth kanalizimit në Nagac që lidhet me lumin Brestoc – Krushë e Madhe, është një kontratë me kanalizime e cila do të përfundoj, nuk e di tjetër çka të shtoj rreth kësaj, përpos asaj që përcaktohen prioritetet mbi bazën e shpërndarjes së buxhetit komunal.

Afrim Limani – Pasi Burimi e lakoj emrin tim, dola t’i jap përgjigje. Nuk është e vërtetë dhe nuk qëndron ajo që ne i kemi borgj operatorit ekonomik i cili merret me mirëmbajtjen dhe servisimin e aparatit mjekësor. Ky shpenzim kryhet nga kategoria mallra dhe shërbime për shkak të keqklasifikimit. Ne nuk kemi mundësi që pagesën ta kryejmë në mënyrë të menjëhershme, mirëpo pagesën e kryejmë muaj për muaj, mund të them që

sot ndoshta ia kemi 5000euro borxh dhe vazhdimisht për çdo muaj operatorit në fjalë ia kemi bërë pagesën. Sot ti do ta kesh emailin me të gjitha fletëpagesa dhe gjendjen e operatorit në fjalë sepse ajo informatë që e the nuk është e qëndrueshme dhe nuk është e vertetë. Pyetja tjetër ishte rreth furnizimit me lëndë djegëse në shkollë. Kontrata është një vjeçare e cila na ka goditur në aspektin e buxhetit për shkak të ngritjes së çmimeve sepse në kontratën e parë çmimi për metër dru ishte 42euro, ndërsa tani e kemi 82euro. Shkollat kanë furnizim mjaftë dhe nuk është problem për lëndë djegëse dhe nuk rrezikojnë për mosfurnizim.

Burim Krasniqi – Drejtor, me thënë “nuk është e vërtetë” i bie që i thua dikujt “po rren” dhe është goxha term i rëndë. E dyta; Unë kam rast në familje me problem të kancerit të gjirit që ka kërkuar t’i kryej shërbimet e mamografisë dhe mamografia nuk ka punuar. Jam i interesuar pse nuk po punon?... Nuk punon se operatori nuk vjen për servisim pa ia paguar 30.000euro, kjo është informatë nga zyrtarët e QKMF-së në Rahovec. Në këtë rast ose unë po e them të pavërtetën, ose dikush nga QKMF ose ti po e thua. Kemi patur nevojë për shërbim të mamografisë, nuk ka punuar pas daljes së fotografisë ndoshta 10 ditë ose 2 javë. Drejtor, e kam një kërkesë direkte, për seancën tjetër në asamble të na tregoni raportin se kur është bërë mamografia e parë prej ditës së vetëdijesimit të kancerit të gjirit, prej protokollit që e keni regjistruar sepse unë jam i kujdesshëm në atë që e them dhe nuk ka dalur këtu për të shpifur sepse kemi pas shumë nevojë si familje ta kryejmë mamografinë dhe nuk e kemi marrë shërbimin. Në QKMF ose nuk ka patur pagesë të serviserit ose nuk ka dashur të kryejnë shërbime. Do zoti nuk sprovoheni në familje se e shihni vet në çfarë shtate do vini, kur të keni situata të tilla.

Afrim Limani – Burim, atë që e thash unë mund ta vërtetosh brenda dy orëve. Nuk thash që nuk i kemi borxh, por vazhdimisht operatorit në fjalë i kemi bërë pagesa. Nuk mundemi në mënyrë të menjëhershme sepse ky planifikim i buxhetit bëhet nga kategoria mallra dhe shërbime për shkak të keqklasifikimeve që i kemi diskutuar. Maksimumi brenda 2 ore e ke në email kartelën e operatorit në fjalë se sa ia kemi paguar, sa ia kemi borxh dhe kur ia kemi paguar.

Nënkryetari – Nuk dua të lidhem me atë a është paguar operatori apo jo, por kjo është paisje (telefoni) dhe prishet, vjen tjetri e rregullon. Ashtu siç thua ti është prishë aparati i mamografisë dhe operatori ka ardh për servisim dhe menjëherë të nesërmen ka filluar puna me mamografi. Vonesat duhet t’i mirëkuptojmë sepse serviseri nuk qëndron aty që në momentin e prishjes ta rregulloj menjëherë, me rendësi është që të nesërmen ka filluar puna menjëherë dhe shumë më mirë që është punuar edhe të shtuneve në këtë drejtim.

Sejfullah Sejfullahu – Nënkryetar të mbeta borxh për sqarim. Më parë e the që duhet të bëjmë presion te organet qëndrore. Por nëse nuk kemi ne kompetenca për verë, nuk e di atëherë çfare i kemi, për ngrohjen globale apo armatimin bërthamor nuk flasim, por thjesht për tema të vreshtarëve dhe është mirë që ta bëjmë një deklaratë me baza ligjore sepse është një prej revistave më të lexuara në Kroaci dhe jashtë saj. E kam parë edhe reagimin e vreshtarëve por më tutje nuk është bërë asgjë. Fatkeqësisht në aspektin filozofik heshtja merret si pohim.

Nënkryetari – Qëllimi jonë është t’i mbrojmë prodhuesit tanë të verës dhe vera është produkt i mbrojtur nga shteti, besoj që duhet të kemi dakordim me ministrinë e bujqësisë dhe të merret vesh se kush ka dalur me këtë deklaratë, institucionet shtetërore atje, apo ndonjë bodrum.

Lirigzon Kastrati – Faleminderit kryesues, pajtohem plotësisht me kolegun Sejfullah Sejfullahu që me të vërtetë duhet të mbrohen prodhuesit tanë. Unë kam një replikë për përgjigjen e nënkryetarit. Nënkryetar, projektin për rregullimin e shtratit të lumit e zhvillon komuna e Rahovecit, është e vërtetë që është me bashkëfinancim, mirëpo tani e 2-3 vite nuk është bërë asnjë investim. Pak më herët e potencova që është një ndër projektet kryesore që i lidh këto 5 fshatra dhe vetëm po iu them një këshillë që në këtë projekt punoni më seriozisht dhe të implementohet brenda afatit të përcaktuar.

Nënkryetari – Lirigzon, sa për informatë ky projekt financohet vetëm prej ministrisë, nuk ka bashkëfinancim. Këtu ka financim të plotë vetëm prej ministrisë, ndërsa komuna i mbikëqyr punimet.

Merisa Sharku – Sa i përket çështjes për drejtorinë e urbanizmit, nuk e di a është e nevojshme t’i citoj fjalët e arkitektëve që më kanë shkruar direkt, ka ndodh vonesa diku rreth 20 ditë, pas pauzës do t’ju tregoj se kur e ka bërë pagesën për aplikim për kushte urbanistike. Sa i përket trashëgimisë kulturore nuk e di ku e gjeni kurajon

për reagim. Në pjesën e parë e bëra një reagim të butë, por nuk e di sa jeni në dijeni që trashëgiminë kulturore në Rahovec e keni në pikën zero. Trashëgimia është dëmtuar tejmasë – e keni shkartuar totalisht. Mbulimi me rrasa apo rivendosja e një qeshmë të re në vend të një kroi të vjetër 250 vjet nuk quhet ruajtje e trashëgimisë kulturore, por nuk keni faj sepse nuk konsultoheni me ekspertë. Për ta bërë ruajtjen e trashëgimisë kulturore duhet të vijmë ekspertë të restaurimit (se di a keni dëgju këtë fjalë ndonjëherë). Trashëgimia kërkon restaurim, jo rrënim të një monumenti historik, më pas t'i thirrni muratorët për ta punuar me tulla apo rrasa. I kemi fotot, nuk e di nëse mundet dikush të më tregoj diçka ndryshe që ka ndodhur, përveç që është ndërtuar një qeshmë e re. Këtu shihet që është ndërtuar një qeshme e re dhe jo restaurim i qeshmes aktuale që ka qenë aty. Sot nuk e ka marrur me veti dokumentacionin e plotë me rrënimin e komplet krojeve të qytetit të Rahovecit, sepse nuk e ka pritë që guxoni të reagoni, komplet krojet e Rahovecit janë mbuluar me rrasa dhe beton. Në seancën tjetër vij me dokumentacion – foto dhe nuk e di si mund ta kundërshtoni një gjë që është faktike.

Drilon Mustafa – Atëherë përshëndetje për të gjithë. Deshta të ndërlihem pak te shqetësimi i Merisë. Realisht në Kosovë nuk ka ekspertë të restaurimit. Restaurimi është shkencë d.m.th çdo kush mund ta mësojë edhe unë si arkitekt dhe të gjithë të tjerët. Përndryshe rreth këtyre qeshmeve që janë; Nëse ka argumente, restaurimi d.m.th nëse diçka është prishur – e zëvendëson me një material tjetër. Këto qeshme zakonisht kanë qenë të rrënuara krejt. Nëse ka argumente që kjo qeshme ka qenë e ngritur, e kemi hequr një guri e kemi vë një guri tjetër ose një material tjetër, atëherë kjo quhet renovim. Përndryshe restaurimi ka të bëjë me përshtatjen e materialit që është përdorur në një kohë të caktuar, sigurisht që nuk mund të gjejmë material që është përdorur para 1200-1300 viteve, por mund ta gjejmë llaqin e përshtatshëm që ta përdorim. Kryesorja është t'ia ruajmë formën dhe nëse është rrënuar duhet ta zëvendësojmë me material adekuat, përndryshe këto qeshme kanë qenë të rrënuara komplet, e kanë një bazë të betonit që mund t'ia heqim rrasat ta shikojmë dhe nëse ka argumente që institucionet përgjegjëse e kanë rrënuar atë që ka qenë ose e kanë zëvendësuar me materiale të ndryshme nga atë që kanë qenë është okej. Përndryshe një objekt që është i rrënuar nuk mund të restaurohet, me restaurim mund t'i mbyllim disa gjurmë të caktuara dhe duhet të mundohemi t'ia përshtatim materialin në kohën e caktuar që ka qenë.

Kryesuesi – Faleminderit Merisa, nëse dikush tjetër nuk ka diçka për ndonjë çështje tjetër, po e përfundojmë këtë diskutim dhe pikën e dytë të rendit të ditës, para se të vazhdojmë me pikë e tretë, po e marrim një pauzë prej 5 minutave, rikthehemi.

3. Shqyrtimi dhe miratimi i propozim vendimit për dhënien e pëlqimit për këmbimin e pronës komunale me pronë private për interes publik;

Afrim Oruqi – Faleminderit kryesues. I nderuar nënkryetar, kolegë drejtorë, të nderuar anëtarë të kuvendit. Sipas ligjeve dhe rregulloreve tjera, kryetari i komunës propozon për juve që të merrni pëlqim për këmbim të pronës publike me pronë private, të dyja këto prona gjenden në zonën kadastrale në Rahovec; Bëhet fjalë për pronën publike me nr. 2186 – 0 me sipërfaqe të përgjithshme prej 5ari e 6 metra katror. Ne ju propozojmë juve që kësaj pjese prej 5 ari e 6 metra katror t'i merret pjesa me sipërfaqe prej 64 m katror me qëllim të hapjes së rrugës publike dhe kjo sipërfaqe t'i jepet pronarit Sylejman Halit Durguti dhe pjesës ku pronar është i njëjti Sylejman Halit Durguti me nr. 2034 – 2 me sipërfaqe të përgjithshme prej 32 ari e 5m katror t'i mirret prej pjesës së përgjithshme sipërfaqja prej 64m katror dhe t'i jepet pronës shtetërore të Kosovës me qëllim të vetëm të hapjes së rrugës publike. Sipas PZHK-së të dyja këtë parcelë bëjnë pjesë në zonë ndërtimore. Në material e keni një raport të formuar nga kryetari i komunës, një komision i cili ka dalë në vend – ka bërë raport në lidhje me vlefshmërinë e këtyre parcelave, parcelat janë të barazvlefshme. Kërkojmë nga ju që të këmbejmë pronën publike me private me sipërfaqe të njëjtë prej 64m katror.

Kryesuesi – Faleminderit drejtor. A ka dikush diçka rreth kësaj pike?... Nëse jo atëherë po e vendosim në votim. Kush është për miratimin e këtij vendimi?... Me shumicë unanime miratohet propozim vendimi për dhënien e pëlqimit për këmbimin e pronës komunale me atë private për interes publik.

4. Shqyrtimi dhe miratimi i projekt statutit të QKMF-së;

Elbunit Kryeziu – Përshëndetje për të gjithë. I nderuar nënkryetar i komunës, kryesues i kuvendit, drejtorë, asambleistë të nderuar. I kam disa përgjigje dhe çështje që janë ngritur rreth statutit. Çështja e parë ka qenë për maternitet; Në statut shkruhet qartë që QKMF “Fahredin Hoti” posedon maternitetin që nga viti 1988 që është njësi e departamentit të mjekësisë familjare siç janë edhe urologjia, pediatria dhe vaksinimi. Rreth ndryshimit që është kërkuar për heqjen së zyrës së prokurimit; Ministria përkatësisht departamenti ka kthyer përgjigje dhe në statut nuk figuron zyra e prokurimit në QKMF. Çështja e zgjedhjes së zv.drejtorit është e rregulluar me udhëzimin administrativ 04/2020 dhe vlen njëkohësisht për të gjitha komunat e republikës së Kosovës. Sa i përket ultrazërit; Specialisti i mjekësisë familjare gjatë specializimit (edhe vet jam specializant i mjekësisë familjare) i kryen modulet ku aplikohet ultrazëri, faktikisht nëse je specialisht i mjekësisë familjare ti je i aftë ta aplikosh ultrazërin, se sa e aplikon, apo nuk e aplikon është në dorë të mjekut dhe prandaj thuhet në statut që specialisti i mjekësisë familjare duhet të dijë të përdorë ultrazërin.

Burim Krasniqi – Po nisna prej të fundit, thotë; Mjeku familjarë duhet të jetë i certifikuar. Kam kërkuar që fjala “certifikatë” mos me qenë në statut sepse gjatë studimeve nuk merr certifikatë për përdorim të ultrazërit. Është përvojë që fitohet, aftësi profesionale por jo certifikatë. Mjekët që jeni aty nuk e besoj që dikush ka certifikatë të miratuar prej odës së mjekëve, kjo na vë në sfidë nesër në zbatimin e statutit, këtu është problemi kryesor, që duhet të jetë i aftë ta përdorë ultrazërin nuk diskutohet ajo punë, por fjala certifikatë nuk besoj që e ka vendin këtu. Nuk e di çfarë statuti e keni ju drejtor, por këtu te unë është e kuartë që figuron zyra e prokurimit. Organizimi i QKMF-së paragrafi 1, neni 1, pika 1.2.4 thotë; Njësia ose zëra e prokurimit, këtu figuron. Nëse thua që duhet me heq, në rregull bëhet ndryshimi kur miratohet statute i QKMF-së. Te çështja e maternitetit; Ne e kemi një QKMF nuk i kemi dy dhe si e tillë nuk duhet më qenë; Në QKMF-të ku funksionon materniteti është i domosdoshëm, por duhet të potencohet te shërbimet te neni 6, pika 5 te lista; Specialist i mjekësisë familjare, stomatolog etj... duhet me qenë gjinekologu, neонатologu dhe pediatri dhe te ofrimi i shërbimeve duhet të ceket p.sh ofron shërbime gjinekologjike. D.m.th paragrafi 6 i neni 6 të largohet, sepse udhëzimi administrative ta mundëson dhe në statut duhet të specifikohet se çka ofron. Kjo pike jo të hiqet, jo të hiqet shërbimi gjinekologjik por të specifikohet te çdo mjek specialist. Te ofrimi i shërbimeve; përveq shërbimeve tjera të specifikohen shërbimet dhe të rregullohet kjo çështje kuartë. Te çështja e zv. drejtorit; Ka ngatërresa, detyrat e zv. drejtorit në statut nuk janë askund. Te neni 13, te drejtori i QKMF-së është një gabim teknik, pika 5 thotë; zv. drejtori ndihmon në ushtrimin e detyrave të përditshme dhe vepron dhe vepron në emër të drejtorit në mungesën e tij. D.m.th duhet të specifikohet çështja e zv. drejtorit, e di që është shumë e rëndësishme që statuti të kalojë, për të rregulluar çështjen e organizimit të brendshëm dhe të funksionoj më mirë QKMF-ja, por besoj që kjo duhet të rregullohet dhe neni 14 të përmirësohet paragrafi 4; Procedurat e emërimit të drejtorit – në paragrafin 4 është; procedurat për përzgjedhjen e zv. drejtorit e udhëhet drejtoria Komunale për Shëndetësi dhe Mirëqenie Sociale d.m.th a është për zv. drejtorin apo për drejtorin?... Një pyetje të fundit; Te neni 6, paragrafi 5 thotë; Specialist i biokimisë, infermier/re i diplomuar, nuk parashihet teknin i infermierisë dhe teknik medicinal. Janë të punësuar me shkollë të mesme të mjekësisë, a nënkupton kjo që këta njerëz duhet të shkarkohen prej punës sepse nuk parashihen këtu. Mendoj që duhet të shtohet edhe teknik infermierisë edhe teknik i mjekësisë sepse i nxjerr problem vetvetes si drejtor dhe menaxhmentit në të ardhmen. Kërkoj që të specifikohet pozicioni i gjinekologut, neонатologut dhe pediatri te neni 6 paragrafi 5. Të specifikohet te shërbimet ofrojnë p.sh; është njësia e gjinekologjisë. Kërkoj që te neni 5 të përfshihen teknika të infermierisë dhe teknika medicinal. Te neni 9 te organizimi i QKMF-së të potencohet sektori ose njësia e maternitetit. Te neni 14 të hiqet fjalia; Procedurat për përzgjedhjen e zv. drejtorit por duhet me qenë; Procedurat e përzgjedhjes së drejtorit sepse bëhet fjalë për drejtorin dhe jo për zv. drejtorin.

Elbunit Kryeziu – Po filloj me çështjen e (teknik infermieri) është neni 5.13 përfundi radiologut shkruan; Profesionistët shëndetësor të tjerë me kualifikim të mesëm dhe të lartë të përcaktohet në regjistrin zyrtarë të ministrisë, këtu hyjnë teknikët infermiorë që janë me shkollë të mesme dhe është e përcaktuar me ligj. Te çështja e ultrazërit për certifikim; Në kuadër të edukimit të vazhdueshëm profesional mundet që institucioni

(QKMF-ja) mjekun familjar nëse e parasheh të nevojshme të ketë trajnime shtesë të ultrazërimit ta dërgoj brenda ose jashtë shtetit për trajnim dhe kjo certifikat njihet gjithashtu nga oda e mjekëve. Zyra e prokurimit është hequr nga statuti, por ndoshta është edhe gabim teknik. Për specifikimin e gjinekologut; QKMF-ja duhet të ketë maternitet, gjinekologun e ka, kur e ka maternitetin duhet ta ketë patjetër edhe neunatologun, duhet të specifikohet edhe kjo ndoshta është statuti me gabime teknike që është përcjellur te ju, përndryshe të gjitha këto që i përmenda kanë ardhur prej ministrisë si të aprovuara.

Kryesuesi – Drejtor, këto propozime që erdhën prej anëtarit të kuvendit, a janë në përputhje apo ka diçka që nuk bën të vendoset në votim.

Elbunit Kryeziu – Përveq propozimit për teknik infermieror që e specifikon shumë qartë statuti, e që hyjnë tek profesionistat tjerë shëndetësor me shkollim të mesëm apo të lartë, kjo pjesë nuk mund të shtohet në statut, ndërsa tjerat janë në rregull.

Kryesuesi – Atëherë e kemi një propozim nga shefi i grupit të LDK-së rreth ndryshimeve në statutin e QKMF-së. Fillimisht po e vendosim në votim propozimin për ndryshimet e lartëcekura. Kush është Për?...Kundër?... Abstenim?... Atëherë me 16 vota për dhe 11 kundër kalon propozimi i Burim Krasniqit. Nëse dikush tjetër nuk ka diçka për të thënë rreth statutit?... Atëherë po e vendosim në votim pikën e 4 të rendit të ditës bashkë me propozimet që kaluan. Kush është për?... Me shumicë unanime miratohet projekt statuti i QKMF-së.

5. Shqyrtimi dhe miratimi i propozim vendimit për ri-destinimin e mjeteve financiare nga buxheti i vitit 2022;

Afrim Limani – Në mbështetje të ligjit të financave publike dhe përgjegjësi, kryesisht neni 30 pika 2, e kemi shfrytëzuar këtë nen për shkak të natyrës së projekteve dhe specifikave të tjera kemi konstatuar se këto projekte rrezikohen të kalojnë në suficit dhe atëherë kemi shfrytëzuar mundësinë për ta përdorur këtë proces dhe kemi bërë një plan të shpërndarjes së këtyre mjeteve duke u ridestinuuar në kuadër të projekteve të ndryshme. Shuma e mjeteve të parapara për ridestitim është 175.608euro, kryesisht në kuadër të 4 drejtorive; Drejtoria e shërbimeve publike, ekonomi – turizëm, urbanizëm dhe arsim. Investimi i zonës ekonomike në Opterushë, e kemi një shumë prej 30.000euro që e kemi menduar ta bartim në projekte me donatorë. Kjo pjesë e mjeteve është si rezultat i krijimit të një marrëveshje që e kemi bërë me ministrinë e industrisë dhe tregtisë, ata plotësisht e financojnë projektin dhe detyrë e jona është të investojmë në pjesën e hartimit të projekteve. Në këtë projekt të planifikuar kemi patur 60.000euro, 30.000 janë ndarë për ridestimin, ndërsa pjesa tjetër për hartimin e projekteve. Në investime në turizëm dhe shtigje të ecjes është një shumë e mjeteve e cila ka mbetur si rezultat i mungesës të ndonjë projekti adekuat brenda këtij viti për t'i shfrytëzuar këto mjete të cilat janë bartur në projekte me donatorë, projekt ky që kemi shumë marrëveshje të nënshkruara me partnerë të ndryshëm. Në urbanizëm kanë ngeluar pa u realizuar edhe 30.000euro dhe ne kemi menduar që këto mjete t'i bartin në mallra dhe shërbime. Në arsim e kemi ndërtimin e shkollës në Retijë 31.987euro, ky projekt ka qenë i buxhetuar me kohë, mirëpo vitin e kaluar operatori në fjalë e ka bërë një padi, ose përmes zyrës së thesarit janë tërhequr mjetet dhe pjesa e buxhetuar që e kemi planifikuar në kuadër të këtij projekti ka ngeluar dhe si rezultat i kësaj janë krijuar mundësitë që edhe ky projekt të ridestinohet. Te riparimi në shkollë në komunën e Rahovecit 16.747euro janë mjete të cilat janë ndërprerë kontratat me operatorët për shkak të shumë arsyeve të ndryshme, me çrast këto mjete kanë ngeluar dhe kemi menduar për ri-destinim. Kjo pikë e rendit të ditës duhet të votohet sepse kemi të bëjmë me 175.000euro, mjete të cilat rrezikojnë të shkojnë në suficit.

Rasim Fazliu – Faleminderit kryesues, përshëndetje për juve, nënkryetarin, anëtarët e kuvendit komunal, drejtorët e drejtorive, përfaqësuesin e KFOR-it – OSBE-së dhe të gjithë të pranishmit në sallë. Unë deshta t'ia bëjë disa pyetje drejtorit të financave; Pse p.sh në buxhet të këtij viti janë paraparë këto projekte e tani në fakt duhet t'i ridestinojmë, a mund të them që ky është një keqplanifikim?... Tjetra, nëse unë nuk jam gabim, për buxhetin e vitit 2023 kemi ndarë mjete për disa projekte që tani dëshirojmë t'i ridestinojmë, pse nuk po vazhdohet të punohet në ato projekte p.sh në zonën industriale etj, etj... Ndoshta kur është bërë buxheti është dashur me kohë

të mendohet për këto mjete, e jo tani t'i ndryshojmë projektet. Tjetra, a mund që këtyre mjeteve t'i ndërrohet kategoria ekonomike, nëse kanë qenë mjete për investime kapitale, ndoshta me i dërgu me një kategori tjetër.

Afrim Limani – Faleminderit mësues për pyetjen, konsideroj që është pyetje me vend. Çdo projekt që aktualisht propozohet për ridestinim ka qenë në listën e projekteve kapitale të planifikuara. E thash edhe në fillim që për shumë arsye këto projekte nuk kemi mundur t'i realizojmë dhe secili projekt në vete e ka karakteristikën e vet dhe aryen që nuk është realizuar. Pas një analize të mirë të bërë nga drejtoria e financave me drejtoritë përkatëse këtë projekte i kemi ridestinuuar aty ku është mëse e nevojshme. Me theks të veçantë e bërë pyetjen për zonën ekonomike. Për këtë zonë ka qenë një buxhet i planifikuar prej 60.000euro, ndërsa këtu i kemi ridestinuuar 30.000euro sepse kemi arritur me ministrinë e zhvillimit ekonomik një memorandum mirëkuptimi dhe tërë këtë projekt e financon ministria e zhvillimit ekonomik. Duke e parë traditën deri më sot, komunës së Rahovecit nuk i ka shkuar asnjë mjet në suficit, për këtë arsye e kemi lënë edhe sot ridestininim dhe nuk kemi nevoj t'i rrezikojmë edhe këto projekte të shkojnë në suficit.

Rasim Fazliu – Drejtor, te kategoritë ekonomike kemi projekte 80.000euro investime kapitale dhe kalojnë në mallra dhe shërbime, a është e ligjshme kjo?... Përndryshe unë jam për ridestinim dhe mjetet mos të shkojnë huq.

Afrim Limani – E thash në fillim që çdo ridestinim i ka arsyet e veta, pyetja jote dhe e shumëkujt mund të jetë pse pikërisht në mallra dhe shërbime? Ne e dijmë që raporti i auditorit për pasqyrat financiare të komunës së Rahovecit ka dalur i keq si rezultat i këtyre keqklasifikimeve, për këtë arsye jemi detyruar që shumë pagesa që kanë qenë të planifikuara në kuadër të investimeve kapitale jemi detyruar t'i paguajmë prej mallrave dhe shërbimeve. Aktualisht janë disa obligime në mallra dhe shërbime, gjithashtu edhe këto projekte e kemi menduar t'i ridestinojmë në mallra dhe shërbime.

Burim Krasniqi – Te pyetja e Rasimit, dua të ndërlidhem pak më ndryshe. Këto investime kapitale; Krijimi parkingjeve në qytet, rregullimi i infrastrukturës së stacionit të autobusave, investime në turizëm – shtigjet e ecjes etj... Cila është arsyeja e dështimit të këtyre projekteve? Njëra prej asambleistëve foli direkt për shqetësimet në shtigjet e ecjes, janë projekte që kanë patur mjete tepriçë? Apo janë projekte të cilat nuk kanë arritur të tenderohen – zhvillohen. Nuk jam i interesuar të shkojnë në suficit, por jam i interesuar pse ka ndodh kjo situatë.

Afrim Limani – Në fillim thash që secili projekt për arsye të ndryshme nuk ka mundur të planifikohet. Pyetja jote ishte për krijimin e parkingjeve të reja në qytet. Për këtë punë më mirë e din drejtori i shërbimeve publike, por jam sqaruar me të dhe arsyeja është për shkak të projektit të sheshit në qendër ...

Kryesuesi – Faleminderit drejtor, dikush tjetër?... Nëse jo, atëherë po e vendosim në votim. Kush është (për) miratimin e këtij propozimi për bartjen e mjeteve?... kundër?... abstenim?... Atëher me 23 vota për, pa vota kundër dhe me 5 vota abstenim, miratohet ridestinimi i mjeteve financiare nga viti 2022.

6. Shqyrtimi dhe miratim i vendimit për miratimin e projekt - planit për trashëgimi kulturore 2022-2025;

Afrim Dina - Faleminderit kryesues, i nderuar nënkryetar, kolegë drejtorë, anëtarë të kuvendit dhe të gjithë të pranishëm. Para juve keni draft propozimin për planin për trashëgimi kulturore në komunën tonë siç po e shihni në projektor. Grupi punues i formuar nga kryetari i komunës me datë 01.08 kanë filluar punimet për planin e trashëgimisë kulturore, gjithashtu janë kryer të gjitha procedurat ligjore për konsultimin publik i cili ka dalur më 18.08 dhe ka përfunduar më 19 shtator. Gjithashtu është mbajtur edhe një konsultim një debat publik me qytetarë këtu në sallën e kuvendit me datë 06 nëntor ku edhe janë marrur propozimet e që më pas janë implementuar në këtë plan. Shfrytëzoj rastin edhe t'i falënderoj për kontributin e tyre të cilët i kanë ndihmuar grupit punues duhe i ndihmuar rreth objekteve të cilat ndoshta nuk kanë qenë të njohura për ne. Poashtu shfrytëzoj rastin ta falënderoj asambleistin z. Eqrem Spahiu i cili për dy ditë rresht në pjesën e Opterushës, Zoqishtit dhe Retijës i ka ndihmuar shumë grupit tonë. Rreth punës të cilën e ka bërë grupi punues në këtë draft; kanë qenë analizat në terren (SWOT analiza) i keni në faqen 12, janë të paraqitura dobësitë që i kemi te objektet apo monumentet kulturore në komunën tonë që kërkojnë mirëmbajtje dhe trajtim. Këtu janë synimet dhe mundësitë që i jep komuna jonë në

gjithë territorin e saj. Materialin iu kemi dërguar, besoj që e keni analizuar. Qëllimi kryesor i këtij plani 2022-2025 është që t'i ruajmë sa më shumë monumentet ekzistuese, monumentet tjera që duhet t'i gjejmë, një pjesë të madhe e ka gjetur grupi punues. Në shtator çdo vit e bëjmë kërkesën në qendrën rajonale në Prizren që këto monumente t'i fusim në trashëgiminë e mbrojtjes. Materialin e kemi bukur voluminoz, nuk dua të iu marr më tepër kohë, këtu do të jemi për të gjitha, ndoshta kemi harruar diçka por e di që grupi punues ka gjetur disa ura tjera, njëra prej tyre është në Fortesë – Pataqan e cila që ka shumë gurë dhe ka nevojë për funksionalizim.

Hasan Përboqi – Faleminderit kryesues. Përshëndetje për kolegët asambleista në veçanti për drejtorin e DKRS-së për këtë prezantim. Konsideroj që plani për trashëgimi kulturore është një dokument shumë me rëndësi, për arsye që i mbledh të gjitha gjërat lidhur me trashëgimi dhe është një dokument që i ka munguar komunës sonë. Konsideroj që një turist kur të vie në Rahovec të paktën e ka një dokument që i ka të përmbledhura të gjitha pasuritë e trashëgimisë kulturore - natyrore apo edhe asaj mikse që i posedon komuna jonë. Dokumenti është voluminoz. Sa kam arritur ta lexoj i ka të përmbledhura shumicën e atyre aseteve të komunës dhe qytetit. Ndoshta është i përmendur diku, por nuk më ra në sy; është një epigraf që gjendet në Teqen e Madhe këtu qytet, pllakë e madhe e gurit që e ka të vizatuar kalaveshin e rrushit. Nuk po e shoh që është i përmendur askund dhe duhet ta dijmë që vlera e këtij objekti është shumë e madhe sepse brenda vetës e prezanton një histori të madhe të rrushit që komuna jonë mburret. Aty prezantohet që treva jonë merret me rrush qysh nga koha romake dhe nëse nuk është ky objekt te këto tabelarë, ta jep përshtypjen që nuk është i përfshirë në këtë plan.

Afrim Dina – Faleminderit z. Përboqi, ndoshta ka lëshim teknik që nuk është përfshirë këtu ajo, por jam i sigurtë që është, sepse vet kam qenë pjesë e planit dhe patjetër që do të jetë.

Sejfullah Sejfullahu – Faleminderit drejtor për informatën. Ne do të kishim pas dëshirë ta qesim “Bunarin e Nezës” që ka histori mbi 200vjeqare, por në atë kohë serbët lokal e kanë mbuluar atë vend. Një pyetje tjetër sa i trashëgimisë kulturore te kufijve administrative të komunave, e kemi pas një “zatop” që pijshim ujë edhe Krusha e Madhe edhe Krusha e Vogël aty në “mexhe”, kush duhet ta rregulloj aty Prizreni apo Rahoveci?... Më pastaj e kam edhe një kërkesë.

Afrim Dina – Faleminderit Sefë. Grupi punues kur ka qenë në Krushë të Madhe, njëri prej anëtarëve të grupit punues është edhe Irfan Ramadani. Në takimet që i kanë mbajtur atje ose kontaktet me banorë duke filluar me Fatmir Sejgullahun dhe shumë të tjerë dhe është konstatuar që do të dalim ta shohim bunarin dhe nëse prej kufijve administrativ në çoftëse gjysa është nga ana jonë duhet ta rregullojmë ne, nëse jo atëherë qendra rajonale e Prizrenit ka përgjegjësi.

Merisa Sharku – Po lidhna pak me Hasanin, është shumë mirë që është bërë një draft i tillë sepse Rahoveci është një ndër qytetet më të vjetër të Kosovës dhe ka shumë trashëgimi kulturore dhe asnjëherë nuk e ka patur një përmbledhje të tillë. Mungesa ka, nuk është i përpiluar në mënyrë shumë profesionale. E vërejta listën e emrave se kush ka qenë pjesë e grupit punues, prap aty nuk pash që ka qenë dikush prej ekspertëve, shumica janë që punojnë në komunë. Grupi punues ose duhet të zgjerohet me ekspertë të fushës ose të zëvendësohet me këta persona. Këtu kisha patur lutje që tani e tutje të vazhdojmë ta ruajmë, po lidhna me pjesën e kaluar që është shkatërruar shumë dhe jo të ekzistojë në mendësinë tonë që një objekt të rinovohet. Te restaurohet, të konservohet dhe të ruhet.

Lirigzon Kastrati – Faleminderit kryesues, i nderuar drejtor. Është mëse i nevojshëm një plan i tillë për trashëgiminë kulturore për komunën e Rahovecit. Komuna jonë ka një trashëgimi ndër shekuj, shumë mire që drejtori e ka formuar grupin punues, siç e tha edhe kolegja parafolëse ka disa mangësi, por meqenëse është dokument që plotësohet vazhdimisht, ndryshim - plotësimet i bëjmë ndërkohë dhe si grup i asambleistave e përkrahim.

Drilon Mustafa – Përshëndetje, e përgëzoj drejtorin për punën e bërë. Materialin e kam lexuar dhe e kam vërejtur që nga fshati Guri i Kuq nuk është asnjë objekt d.m.th në bazë të fotove Guri i Kuq nuk është përfshirë!

Afrim Dina – Derisa Skenderi e kërkon në monitor, faleminderit shumë për kontributin. Rreth pjesës së atëtarëve të grupit punues i kemi kontaktuar edhe 4 qytetarë tjerë që janë të fushës, mirëpo për shkak të angazhimeve që i kanë ata, janë përgjigjur me falënderime po që nuk mund të marrin pjesë dhe n'a është dashur tamarrim barrën përsipër dhe të dalim vet në terren. Te Driloni, është Guri i Kuq dhe sipas të dhënave ne e kemi vendosur në planin e trashëgimisë.

Kryesuesi – Faleminderit shumë. Pa humbur kohë ne po e vendosim në votim, kush është për?... Me shumicë unanime miratohet vendimi për projektin e planit të trashëgimisë kulturore 2022-2025. Atëherë çdo herë e kam dëgjuar që Krusha e ka zemrën e gjërë, këtë po na dëshmon edhe Sefa sot, i cili për kohën e pauzës na ka nderuar duke na përgatitur dy fli.

Sejfullah Sejfullahu – Kjo është sa i përket planifikimit se kur do të bëhet “Agro-Festa” dhe kur jemi të trashëgimia e vjetër; Bukë e krip e zemër.

Kryesuesi – Të nderuar anëtarë të kuvendit, drejtorë të drejtorive, të gjithë të pranishëm. Po fillojmë pjesën e mbetur të seancës. Falenderojmë për drekën z. Sejfullah Sejfullahu dhe zonjën e Sefës, Bukurijen.

7. Shqyrtimi dhe miratimi i vendimit për caktimin e normave tatimore për tatimin në pronën e paluajtshme për vitin 2023;

Afrim Limani – Përshëndetje. Sipas ligjit 06/ L-005 mbi tatimin në pronën e lejueshme, të gjitha kuvendet komunale janë të detyruara që ta votojnë normën tatimore. Sa për informimin tuaj kufijtë minimal dhe maksimal të normave tatimore janë nga 0.16% deri në 1%. Në nivel të republikës së Kosovës, komuna jonë i ka normat më të ulëta.

Rasim Fazliu – Faleminderit kryesues. E falënderoj drejtorin dhe desha ta pyes a ka ndryshime të normave tatimore që janë deri tash, cili është ndryshimi, po të ishte një tabelë këtu ndoshta nuk do ta kisha bërë këtë pyetje. Pra, a ka ndonjë ndryshim të normave tatimore karshi normave që kanë qenë.

Afrim Limani – Faleminderit mësues për pyetjen. Ndryshim në norma tatimore nuk ka që nga viti 2018, janë të njëjtat norma tatimore, mirëpo janë shtuar parcelat dhe njësitë pyjore të parcelave.

Kryesuesi - Faleminderit drejtor. Dikush tjetër ndonjë gjë rreth kësaj pike?... Nëse jo, atëherë po e vendosim në votim, kush është për miratimin e kësaj pike?... Me shumicë unanime miratohet edhe vendimi për caktimin e normave tatimore.

8. Shqyrtimi dhe miratimi i vendimit për miratimin e planit komunal për menaxhimin e mbeturinave 2022-2027;

Mirsad Shala – Faleminderit kryesues, i nderuari nënkryetar, drejtorë të drejtorive, anëtarë të kuvendit. Me datë 23.09.2022 kuvendi i komunës ka marrë vendim për miratimin e planit për menaxhimin e mbeturinave, mirëpo nga ministria e Mjedisit dhe Planifikimit Hapësinor kemi pranuar një shkresë në të cilën na kanë udhëzuar që në titullin e këtij plani që ka qenë më herët 2022-2026 është dashur të jetë 2022-2027, kështu që nuk ka ndryshime tjera përpos vitit, plani për menaxhimin e mbeturinave është 5 vite dhe jo 4. Gjithashtu edhe pika pasuese sa i përket planit tre vjeçar për banim e ka të njëjtin udhëzim, d.m.th grupet punuese kanë bërë gabim në përlogaritjen e viteve, çdo gjë tjetër është në rregull. Ne e kemi parë të arsyeshme të mos bëjmë plotësim – ndryshim, por e kemi shfuqizuar vendimin e mëparshëm për të hyrë në fuqi ky vendim i ri.

Rasim Fazliu – Faleminderit kryesues. Është bërë si traditë kopjimi i dokumenteve prej komunës në komunë. Në çoftë ky është plani për miratimin e menaxhimit të mbeturinave për komunën e Rahovecit, këtu në këtë plan nuk janë të shkuara as faqet që të jemi në dijeni se në cilën faqe jemi duke shfletuar, por në fletën e dytë shkruan kështu: Ministria e Mjedisit - Planifikimit Hapësinor dhe Infrastrukturës pas shqyrtimit të ligjshmërisë së aktit në fjalë, për ndryshimit dhe plotësimin e rregullores... kërkon nga kuvendi i komunës së Prishtinës, deshta të pyes; ne a jemi komuna e Rahovecit a e Prishtinës, në çoftëse është gabim teknik duhet përmirësuar dhe të shkruhet drejtë. Tjetër; është e vertetë që këtë rregullore e kemi kaluar një herë, por për shkak të arsyes së lartëcekur për

shkak të afatit 5 vjeçar e ka rikthyer MAPL-ja. Aq sa unë e kam lexuar brenda aty, deponia rajonale në Landovicë ka patur afar deri në vitin 2020, më pas është shtyrë deri 2025, meqenëse ky plan ka afat deri më 2027, shtrohet pyetja e keni menduar ku do të bohet deponia rajonale në ato vitet pas 2025, ku i dërgojmë mbeturinat dhe a është i paraparë vendi deri në 2027.

Mirsad Shala – Kërkoj falje që nuk e përmenda në fillim që në mungesë të drejtorit, unë kam dalur t'i mbroj këto dy pika në fakt t'i prezantoj. Pikën e pare që e ceku baca Rasim është gabim i ministrisë së mjedisit dhe planifikimit hapësinor, ndërsa te pika e dytë drejtorit duhet me ia dërgu pyetjen sepse unë jam vetëm prej prezantimit e pikave.

Kryesuesi – Faleminderit. Dikush tjetër diçka?... Atëherë po e vendosim në votim pikën e 8-të të rendit të ditës. Kush është për?... Me shumicë unanime miratohet edhe vendimi për miratimin e planit komunal për menaxhimin e mbeturinave.

9. Shqyrtimi dhe miratimi i vendimit për miratimin e programit komunal tre vjeçar për banim 2022 – 2025;

Kryesuesi – Pikën e 9-të po e vendosim në votim menjëherë sepse zyrtari ligjor e dha sqarimin edhe për këtë pikë duke thënë që gabimi ka qenë i njëjti te përllogaritja e viteve. Por nëse dikush dëshiron ta marr fjalën?...

Lirigzon Kastrati – Faleminderit kryesues, drejtorë të drejtorive, kolegë asambleistë. Po shihet që shumicën e vendimeve MAPL-ja është duke i kthyer, kërkoj që drejtori ose zyra ligjore më konkretisht në përpilimin e këtyre akteve të jenë më serioz ose më të përpikt që vendimet e dala nga kuvendi mos të na kthehen, sepse 2-3 herë po na bie të votojmë për një pikë të rendit të ditës. Dokumentet që i bie drejtori duhet të jenë me efektivitet të mirëfillt.

Mirsad Shala – I nderuar, e ceka edhe më herët që nuk ka qenë gabimi te përpilimi i vendimit nga zyra ligjore, mirëpo gabimin e ka bërë grupi punues dhe drejtoria që nuk e ka bërë mire përllogaritjen e viteve. Nuk ka të bëjë asgjë me përpilimin e akteve.

Kryesuesi – Faleminderit Mirsad, edhe pse replika ishte me vend, zyra ligjore të jetë më e vemendshme. Atëherë po e vendosim në votim pikën e 9-të, kush është për?... Me shumicë unanime miratohet edhe vendimi për miratimin e planit komunal tre vjeçar për banim.

10. Shqyrtimi i raportit financiar për periudhën janar – shtator 2022;

Afrim Limani – Përshëndetje edhe një herë, raporti financiar 9 mujor është i përbërë nga 3 pjesë; Pjesa e analizimit të të hyrave, pjesa e shpenzimit të buxhetit si dhe pjesa e zhvillimit të kontratave në kuadër të zyrës së prokurimit. Çdo ngjarje mbrenda këtyre muajve janë të përfshira në kuadër të këtij raporti. Të hyrat deri në këtë periudhë në total janë; 929.072euro, nëse bëjmë një krahasim me periudhën e njëjtë me vitin e kaluar, kemi një rritje prej 5681euro. Muaji shtator ka qenë një ndër muajt më të varfër sa i përket inkasimit të të hyrave sepse ka reflektuar greva e mbajtur nga sindikata e shërbyesve civil. Ju rikujtoj që ende nuk e kemi raportin 3 mujor nga gjrobat e gjykatave të trafikut, për këtë arsye e kemi një ndryshim negativ apo një zvogëlim prej 64.000euro që në këtë rast i kemi 1.1 milion bashkë me 3 mujorin e parë të këtij viti inkasim të të hyrave. Konsideroj që raporti do të na vjen shumë shpejtë dhe nëse bëjmë një krahasim me periudhën e njëjtë të vitit të kaluar kemi një rritje të të hyrave. Te shpenzimi i buxhetit; në total është 11.111.779euro ose 67.65%. Mallra dhe shërbime 70.30%, komunalitë 79%, subvencionet 80.53%, shpenzimet kapitale 71.06%, pagat 63.76% dhe në fund e kemi raportin nga zyra e prokurimit me të gjitha ngjarjet apo kontratat të cilat janë kontraktuar nga janari deri në shtator të këtij viti.

Burim Krasniqi – Faleminderit kryesues. Drejtor, të falenderoj për paraqitjen goxha të gjërë të paraqitjes së raportit të shpenzimeve. Te tabela 1.2 faqe 3 te të hyrat duhet me qenë ndonjë gabim teknik sepse kur e bëjmë në përqindje, përqinjda e realizimit të vitit 2022 në muajin mars nuk është 6.48% por duhet të jetë më e madhe, është gabim teknik. Te muaji qershor është 6.6%, te korriku 2.55% totali 8.20% d.m.th kur kolonën 3 me kolonën 2 e

kthejmë në përqindje atëherë kjo duhet të jetë më e madhe dhe jo me qenë vetë 6% dhe besoj që duhet të përmirësohet te raporti final. Tek të hyrat te faqe 6, tabela 1.6 kodet 50,40,9 participimet në arsim, të hyrat 22.815.50 euro çka participohet në arsim dhe si realizohen këto të hyra këtu?... Te tabela 3.1 faqe 8 te shpenzimet sipas programeve zyra e kryetarit deri më tani ka dhënë 117.530 euro subvencione, çka përfshihet? Sepse është shifër shumë e madhe prej zyrës së kryetarit. Te tabela 3.2 faqe 9, te shpenzimet kapitale janë 4.237.584 prej alokimit prej 5.67milion, që në një formë edhe 1.440.000 euro janë të mbetura për periudhën tetor - dhjetor. A është kjo që kryesisht janë paguar borjet të punëve të kryera të viteve paraprake sepse nuk besoj që kemi arritur të tenderohen dhe të kryhen procedurat e vitit 2022 që të shpenzohet në shtator 74% e buxhetit për investime kapitale, a nënkupton kjo që borjet e viteve paraprake janë paguar në këtë periudhë kohore? Shpenzimet e avokaturës të shpendara nëpër drejtori te tabela 3.3 janë; Te zyra e kryetarit dhe drejtorja për buxhet dhe financa janë 21.875 euro në 2022 për dallim nga ajo që në vitin 2021 kanë qenë vetëm 1440euro për këtë periudhë kohore. Në vitin 2021 nuk e keni patur asnjë gjobë të gjykatave, në 2022 në këto sektorë janë 9405euro gjoba. Janë rritur shpenzimet e avokaturës rreth 1000% dhe në anën tjetër janë rritur gjithashtu edhe shpenzimet e gjobave të gjykatës, kjo i bie që nuk ka patur efekt avokatura e kontraktuar nga ana e komunës. Te drejtorja e shërbimeve publike, zjarrfikësat, zyra për komunitete, bujqësia, ekonomia dhe kadastra, prap janë 3161euro pagesa të avokaturës dhe 17.948 euro gjoba të gjykatave dhe përsëri trend negative në raport me vitin 2021 që kanë qenë vetëm 150 euro. Gjjobat e gjykatave komplet janë 31.148 euro edhe pse pagesa të avokaturës në 2022 janë rreth 28.240 euro. A është shqetësuese pse paguhet zyra e avokaturës kaq e në anën tjetër të rriten gjjobat që vijnë nga gjytata. Më mirë do të na mbronte një zyrtar komunal – jurist sesa një zyrë e avokaturës me kaq pagesa. Drejtor, keni shumë kontrata për konsulent individual, disa mund të jenë të arsyeshëm por, konsulent për pranim të aplikacioneve për fermer me kontratë për dy vite është shumë e gjatë. Te pjesa lott.11 dhe lott.12 konsulent individual arkitekt dhe nuk jepet periudha kohore prej kur deri kur dhe për të gjithë këta njerëz konsulent që vlerësohet që janë të fushës paga mujore e tyre është vetëm 360euro, nëse ka arkitekt që vie për 360euro për mua është befasuese edhe pse për të mire në kuptimin e komunës por nuk besoj që ekziston në realitet. Te tenderi mirëmbajtja e shtigjeve të ecjes Dejnë – Krushë e Madhe – Dradish – Drenoc – Rahovec, mjetet e alokuara janë 42.323euro e kompania e kontraktuar është 25.481 euro 50% më lirë se planifikimi, a duhet të jetë operatori i papërgjegjshëm apo është bërë një huqje në planifikim zyrtarët e komunës. Ofrimi shërbimeve juridike – lirgjore për nevoja të komunës, ritenderim 2022-2024 është planifikuar 124.000euro, ka konkuruar fiks me 124.000euro dhe e ka fituar. Rasti tjetër; Ruajtja dhe trajtimi i vlerave të trashëgimisë kulturore - krijimi i sigurisë të levizjes së qytetarëve, planifikimi është 174.519euro, kontrata është 174.500euro me diferencë 19euro, d.m.th shumë i përputhur planifikimi me përfituesin dhe është pak shqetësuese. Te pjesa tjetër; Ndërtimi i depos bujqësore këtu është vetëm alokimi, vlera e kontratës nuk është e cekur, 499.169euro. Shpresoj që nuk e kam tepruar dhe e gjej mirëkuptimin e juaj në këtë drejtim.

Leonard Morina – Faleminderit kryesues, përshëndetje për të gjithë. Drejtor, unë e pata një pyetje te tabela 2.1 te shpërndarja e faturave - regjistrimi dhe verifikimi të objekteve në tatim në prone. Në vitin 2021 numri faturave të shpërndara është më i madh sesa në vitin 2022 për 816 fatura më pak. Numri i objekteve është për 158 objekte më shumë apo 28.000 metra katror d.m.th sipërfaqe ka më shumë, fatura të shpërndara ka më pak, pse në vitin 2022 ka ndodh shpërndarja më e vogël e faturave kur dihet që objekte dhe sipërfaqe për metër katror kemi më shumë.

Afrim Limani – Burim, keni bërë shumë pyetje, nëse nuk mundem të përgjigjem në të gjitha mund ta bëjmë bisedën interaktive. Te faqja 3, gabimi në përqindje; të them të drejtën as unë as punëtorët e mi nuk e vërejmë këtë sepse vetëm sipas formulës del ai rezultat automatikisht, sido që të jetë faleminderit. Te participimi në arsim; Si kod ekziston dhe duhet të ekzistoj sepse është rregull financiar dhe që realisht deri më tani nuk kemi patur të hyra. P.sh dikush bënë kërkesë ta vazhdoj arsimin joformal pas orarit të punës si në arsimin fillor dhe të mesëm

edhe pse deri më tani nuk kemi patur kërkesa përveç njëres. Ndërsa 22.815 janë të hyrat nga qerdhja e fëmijëve, participimi në kuadër të qerdhes së fëmijëve. Pyetje tjetër ishte; Zyra e kryetarit ka bërë shpenzime në subvencione në vlerë prej 117.530. Këtu 64.000euro janë bursa për student, përafërsisht 30.000euro janë shpenzime që kryetari i përgjigjet qytetarëve në bazë të kërkesave shëndetësore për sëmundje të ndryshme. Shpenzimet kapitale, 4.237.000 kanë ngelur, mos të harrojmë që raporti është i përgatitur deri më 30 shtator, deri më këtë datë shpenzimi i buxhetit për investime kapitale ka shkuar 75% dhe ju garantoj që deri në fund të vitit do të hargjohet deri në 98%. Te shpenzimet e avokaturës; Është e verëtetë që e kemi një kontratë për shërbimet të avokaturës dhe vlera e shpenzimit deri tani është 24.000euro dhe në cilësinë e drejtorit më ka interesuar edhe mua por një ankesë për ta bërë kishte goxha një kosto dhe të gjitha këto ndodhin për shkak të numrit të madh të padive që na bëjnë mësuesit është arritur kjo vlerë. Besoj që vitin e ardhshëm dukshëm do të bie kjo vlerë sepse kemi shumë ankesa dhe padi nga ana e mësimeve sa i përket kontratës për shujta. Pyetja tjetër ishte rreth shërbimeve konsulente, pse kaq shumë konsulentë. Në kontratë shkruan që kompania kontraktuese të gjithë fermerëve iu ka përgatitur edhe projektin për aplikim të cilët kanë një kosto. Kemi konsulentë që kemi patur nevojë për ta, sipas ligjit në fuqi e kemi hapur këtë tender, kanë aplikuar njerëzit që realisht kanë nevojë për punë. P.sh për drejtorinë time kam nevojë shumë për punëtorë sepse kam staf të reduktuar, tani janë punësuar njerëzit dhe punët po ecin mirë si me regjistrim njëjtë edhe me inkasim. Te kontratat që the për vlerën e parashikuar që është lidhur me një ndryshim shumë të vogël të mjeteve, janë ligjet në fuqi nuk e di pse, çdo gjë ka shkuar përmes zyrës së prokurimit e cila është shumë e monitoruar nga çdo kush.

Sinan Kryeziu – Faleminderit kryesues, përshëndetje për të gjithë të pranishmit që janë në sallë. Unë dua të ndërlidhem me drejtorin për punën e shpenzimeve të avokatit. Sdi sa e kujtoni ju, unë pata ngritur si shqetësim në momentin që është lidhur kontrata mes komunës dhe avokatit, dhe për shkak që jam jurist e kam paraparë që do të ndodhin këto pasoja buxhetori në dëm të qytetarëve dhe taksave të tyre. E kapa për fjalë drejtorin kur tha që kemi kontratë të jurisposdencës, tani drejtori këtu me dashje ose pa dashje na lë të kuptojmë që avokati duhet të jetë me jurisposdencë i regjistruar e licencuar në odën e avokatëve të Kosovës. Te çështjet civile jam munduar në formën time ta ngrisë këtë shqetësim dhe ta ndalim këtë kontratë të dëmshme. Drejtori tha që për momentin janë dhënë 24.000euro. Këta detyrohet që 50.000euro me ia dhënë avokatit për përfaqësim. Nuk është problem që komuna dëmtohet me 50.000euro, këta e dëmtojnë edhe në procedura gjyqësore. Pata thënë disa here duke e përsëritur, këta i kanë kontestet e humbura. Mendoj që te çështjet civile nuk duhet te jetë patjetër avokat i regjistruar në odën e avokatëve të Kosovës, te çështjet civile mund ta përfaqësoj çdo jurist. Këta i kanë 5 jurista, duhet sa më parë ta shkëpusin këtë kontratë duke ia kërkuar rezultatet pozitive avokatit në fjalë, avokati paguhet për kryerjen e shërbimeve në interes në komunë jo vetëm të gjepit të vet personal. Për këtë çështje do të ballafaqohem me kryetarin. Për një padi, juristi paguhet sipas vlerës së kontestit dhe kjo është e rregulluar me ligj. Nuk është në pyetje që do ta paguajmë avokatin 50.000euro, këtu do të paguhen shpenzimet gjyqësore si dhe avokatin që ka parashtruar padi në fund ndaj në këtë rast paditësit. Sinqerisht është shqetësuese, me informacionet që i kam unë, këta i kanë rreth 800 padia të parashtruara, janë shifra të mëdha dhe në fund viktimizohen duke thënë që nuk është problem jonë por i shtetit që nuk e ka rregulluar këtë me ligj. Juristat munden, kam propozuar me hy në marrëveshje me paditësat, tërhiqe padinë si e përcakton ligji dhe ne bëjmë marrëveshje, sa i përket parave e bëjmë me rata sepse të gjithë jemi njerëz duhet ta gjejmë një mes që t'i ikim shpenzimeve. Këta do t'i humbin të gjitha paratë. Faleminderit.

Lirigzon Kastrati – Faleminderit kryesues. Për drejtorin e financave i kam dy pyetje rreth këtij raporti financiar. Të hyrat komunale, veçanërisht ty hyrat që rrjedhin si obligime të rentes dhe qirasë komunale sa janë realizuar?... E dyta; Çfarë veprime juridike ka ndërmarrë komuna në drejtim të realizimit të të hyrave komunale, kur dihet se nga kalimi i afateve ligjore komunës i shkaktohet dëme.

Afrim Limani – Nëse jeni të interesuar për kurrëshje të të gjithëve, unë mund ta thërras edhe avokatin këtu që ai të jep një raport më të detajizuar para juve. Leonardi pyeti rreth dallimi të faturave në 2021 janë 13.320, ndërsa në vitin 2022 janë më pak, arsyeja është sepse në këtë vit e kemi bërë një veprim shumë duhur duke e bërë monifikimin e tatimpaguesve. Kemi arritur që në kuadër të një tatimpaguesi (një letërnjoftimi) të bëjmë bashkimin e të gjitha atyre pronave që është pronar personi fizik dhe për këtë arsye ka ardhur deri te ky zvogëlim. Lirigzoni, te të hyrat nga qiraja; Te kodi 50407 të planifikuara janë 80.000, ndërsa të realizuar janë 56.530 euro. Me periudhën e njejtë të vitit të kaluar kemi dallim 24.000euro që i bie inkasimi në qira të jetë mjaftë i mire. Pyetja tjetër lidhur me marrjen e ndonjë veprimi për mospagesën e llogarive të arkëtueshme, të them të drejtën drejtoria për ekonomi ka marrur disa veprime si taksa afariste si dhe në qira sipas kontratës. Tatimi në pronë është një problem më i madh me shumë borgje, janë duke u rregulluar disa procedura ligjore dhe me “kismet” vitin tjetër mars – prill duhet të dërgohen te përmbaruesit.

11. Informatë për përgatitjen e vitit shkollor nga DKA-ja 2022/2023;

Avni Morina – I nderuar kryesues, nënkryetar, anëtarë të kuvendit, të nderuar drejtorë. Këtë informatë e keni në e-mailat e juaj të shpërndarë nga sekretaria e kuvendit. Aty jemi munduar të pasqyrojmë fillimit e aktivitetit që e kemi ndërmarrur për fillimin e vitit të ri shkollor 2022-2023. I kam pasqyruar të gjitha aktivitetet e muajit të fundit dhe fillimit që parashihet në shtator. E para është plotësim i informatës, e dyta është një pyetje që e ka bërë asambleistja Besa Bytyqi në KPF. Në kohën kur është bërë informata kam thënë që së shpejti do të bëhet furnizimi me lëndë ngrohëse në shkolla, ndërsa në këtë informatë ky proces gati është në përfundim, kanë mbetur edhe dy shkolla për furnizim. Te përgjigja për orarin e punës për edukatorët e fëmijëve në qerdhe; Bazuar në udhëzim administrativ qerdhja hapet në 7:30, puna fillon në 08:00 – 16:00, mirëpo nuk mbyllet deri në 16:15.

Fahrije Lushi – I nderuar kryesues, nënkryetar, drejtorë dhe kolegë këshilltarë. Meqë drejtori sot ishte më i shkurtë dhe i prezantoi shumë mirë dy pikat më kryesore dhe meqë ne jemi pjesë e komitetit për arsim kemi mbledhur të dhëna të ndryshme nga shkollat të ndryshme në qytet dhe fshatra. Më intereson nga drejtori informacioni se sa po respektohet lista e pritjes sepse ka mjaftë ankesa nga kandidatë të ndryshëm. Pastaj është edhe një shqetësim tjetër sesa po realizohen zëvendësimet të shtunave, a keni biseduar me drejtoritë e shkollave dhe këshillin e prindërve dhe ku është problemi që nuk realizohen zëvendësimet të shtunave.

Leonard Morina – Faleminderit. Pasiqë edhe unë jam në komitetin për arsim, shumica e shkollave janë të furnizuara me dru dhe deshta ta bëjë një krahasim. Në vitin e kaluar një metër dru ka kushtuar 48euro, kurse në këtë vit është nënshkruar kontrata prej komunës me 83euro për metër kub. Nëse shkollat e kanë patur buxhetin 10.000euro dhe 5000euro zakonisht shkojnë për dru. Shkolla e Malësisë së Vogël për 150metra ka paguar 6750euro tani për 150metra duhet të paguhet 12.450euro d.m.th 90% e buxhetit të shkollës hargjohet për dru, a ka paraparë drejtori ndonjë buxhet shtesë, a ka kërkuar mjete prej drejtorive përkatëse ose si do të bohet zgjidhja deri në përfundim?...

Lirigzon Kastrati – Faleminderit kryesues. E lexova informatën që drejtori e ka prezantuar. Më intereson një pyetje për drejtorin. Zvogëlimi i numrit të nxënësve ka shkaktuar probleme dhe ka ndikuar edhe në zvogëlimin e numrit të klasave, sa ka qenë numri i të regjistruarve për herë të parë vitin e kaluar në komunën tonë dhe sa është tani?...

Avni Morina – Falenderoj të gjithëve për kontributin. Zonja Fahrije Lushi; Sa po respektohet lista e pritjes së kandidatëve?... Gjatë këtij viti shkollor kemi patur konkurse në fillim të vitit dhe sipas nevojës. P.sh për programin fillorë dhe parafillorë nuk e kemi patur problem sepse e kemi hapur konkursin në muajin shkurt, procedurat e konkursit janë zhvilluar rreth 1.5 muaj sipas ligjit. Në këtë program i kemi ftuar kandidatët nga lista e pritjes me radhë. Viti i ri shkollor nuk filloi me kohë, për shkak të grevës dhe viteve të kaluara për shkak të pandemisë por ju garantoj që lista e pritjes po respektohet në mënyrë të vazhdueshme sepse nuk guxojmë ta kalojmë radhën e atyre kandidatëve që janë kualifikuar sipas konkursit. Zëvendësimi i të shtuneve nuk po bohet

për arsye se ende nuk kemi marrëveshje në mes ministrisë së arsimit dhe sindikatës. Ne si DKA nuk kemi të drejtë t'i obligojmë mësimdhënësit të mbajnë mësim sepse nuk e kemi bërë grevën dhe nuk mund ta mbylлим. Si DKA kemi propozuar që gjatë ditëve të punës të bëhet zëvendësimi me nga një orë sepse 185 ditë mësimi i ka viti shkollor, mirëpo kjo ide nuk është përkrahur dhe në fund kemi mbetur pa marrëveshje. Te kontrata për lëndë gjuhëse (dru dhe pelet), drejtorja e arsimit bashkë me drejtorinë e financave jemi kujdesur ta bëjmë mbulimin buhetor të kontratës së re që e kemi lidhur sepse ne e kemi patur një kontratë 3 vite mirëpo për shkak të ankesave të mëdha të operatorit jemi detyruar ta shkëpusim atë kontratë, kemi lidhur kontratë të re sipas çmimeve të tregut me 83 euro për metër kub, peleti 650 një ton. Do të mundohemi që t'i mbulojmë kërkesat e shkollave dhe e kemi bërë një plan të shpërndarjes. Është formuar një komision i cili do të bëjë kontrollin e shpenzimit dhe finalizimit duke i raportuar kryetarit të komunës çdo dy javë. Lirigzon, zvogëlimi i numrit të nxënësve është vërtetë shqetësues sepse çdo vit rreth 300/400 fëmijë më pak i kemi nëpër shkollat tona dhe është vërtetë dukuri shqetësuese. Sivjet në bazë të dhënave zyrtare që i kemi regjistruar së fundmi janë 400 nxënës më pak sesa vitin e kaluar, prej klasave parashkollore deri te klasa 12, d.m.th ky është totali prej të gjitha paraleleve, vitin e kaluar ka qënë 9000 nxënës sivjet është 8600. Është dukuri shumë shqetësuese sepse kur zvogëlohet numri i nxënësve, zvogëlohet edhe numri i klasave dhe rrjedhimisht zvogëlohet edhe fondi i orëve të cilat duhet t'i mbajë mësimdhënësi.

Fahrije Lushi – Me shumë kënaqësi e marr këtë përgjigje të drejtorit që po respektohet lista e pritjes, mirëpo çka nëse ka ankesa që ekzistojnë dhe figurojnë që është shkelur lista? Nuk jam këtu t'i them emrat, por ka ankesa dhe kam informata sidomos te cikli parashkollor është “kapërcy” pak.

Vlora Vuçiterna – Një pyetje të shkurtë për drejtorin e arsimit. A dihet saktë se kur do të përfundojnë punimet në shkollën “Isa Boletini” meqenëse fëmijët që vijnë në mësimet në parashkollor janë të detyruar që rreth 40 nxënës t'i vijojnë mësimin bashkë në një klasë.

Avni Morina – Së fundi e pata një rast te lënda e gjuhës angleze dhe personin që ishte në listën e pritjes zyrtarisht e ftova në DKA dhe i thash që je në listën e pritjes, janë 12 orë të lira në fshatin Pastasel dhe Kaznik. Keni të drejtë të shkoni në zëvendësim për 6 muaj minimum sepse lehona mund të merr pushim deri në një vit. Tha jo, nuk jam i interesuar. Atëherë jam detyruar ta thërras tjetrin pas tij dhe kjo nuk është shkelje sepse unë duhet të bëjë zgjidhje. Zyrtarisht deri në këtë moment që po flasim nuk kemi asnjë ankesë për listën e pritjes. Vlora faleminderit, pyetje me vend. Dje kam vizituar shkollën “Isa Boletini” kemi biseduar për çështjen e kthimit të fëmijëve nga shkolla “Sadedin Hajda” që janë përkohsisht atje. Punimet në shkollën “Isa Boletini” ndonëse gati kanë përfunduar, kanë mbetur edhe dy pompa të kalldajës të montohen për ta bërë funksionale ngrohjen qëndrore. Sa për informacionin tuaj, ne para 10 dite bashkë me kryetarin i kemi dërguar një shkresë zyrtare fondit të Kosovës për eficiencë të energjisë duke iu kërkuar që sa më parë të përfundojnë punimet e eficiencës në shkollën “Isa Boletini”, në “Bekim Sylka, në “12 Maji”, në “Skender Kastrati” paralelja në Gexhë e cila ka një kulm në gjendje të mjerueshme. Kjo është përgjigja adekuata dhe në çoftëse nuk ndodh riparimi i atyre pompave të kalldajës apo pompave termike, unë bashkë me juve do të protestojmë.

Kryesuesi – Faleminderit drejtor. E kemi një informatë; Prej sekretarisë së kuvendit nëpër emailat tuaj e keni një kërkesë të bashkangjitur me një link, kërkohet të plotësohet nga ju, linku ka të bëjë për çmimin e ekselencës komunale. Ky pyetësor synon ta vlerësoj punën e komunës sonë dhe 12 komunave tjera që bëjnë pjesë në këtë garë. Po ju lutem që ta plotësoni dhe t'i kushtoni vëmendje. Një informatë tjetër; Është një aktivitet “Muzet e Alpeve” për më gjerësisht e paraqet drejtori.

Afrim Dina – Faleminderit kryesues. Nesër në ora 13:00 në sallën e kuvendit është një aktivitet që duhet “Muzet e Alpeve” nga shoqata “Teuta” që është nga pjesa e Malit të Zi. Do të vijë shumë letrarë, iu kemi shpërndarë dhe e kemi publikuar nëpër rrjete sociale. Ju ftoj të merrni pjesë nesër prej orës 13:00.

Merisa Sharku – Pyetja është për drejtorin e DKA-së, më herët është fituar një grant prej ministrisë për shkollën në Pastasel, kur do të fillojnë punimet po pyesin banorët e Pastaselit?...

Ami Morina – Shkolla në Pastasel dhe qerdhja në qytet kanë qenë projekte të miratuara dhe buxhetuara nga niveli qendror dhe asnjëri prej këtyre projekteve nuk ka marrur dritë të gjelbërt për të filluar. Nga DKA është lëkuar shumë më herët që t'iu ofrojmë situacionin e terrenit, kopjen e planit, dokumentet e parcelës etj... Por nuk është asnjëherë edhe pse kanë qenë të buxhetuara 100.000euro për shkollën në Pastasel dhe 60.000 euro për qerdhen në qytet në legjen epërme asnjëri prej këtyre dy projekteve deri në kohën kur po flasim nuk ka filluar. Ndoshta mund të fillojë projekti gjatë këtyre ditëve, në anën tjetër shpresoj që mos ta hudin poshtë ose të paktën të planifikohet të fillohet vitin e ardhshëm.

12. Shqyrtimi i raportit të performancës komunale për vitin 2021;

Nënkryetari – Faleminderit kryesues. Në mungesë të Biondinës si koordinatorë për performancë lokale, po e prezantoj shkurtimisht. Ky raport përmban 19 fusha të raportimit me gjithsej 109 tregues, raporti i performancës është për vitin 2021. Për secilën fushë i keni shënimet në detaje në bazë të përqindjes. Për dallim prej vitit të kaluar, monitorimi është shumë më i madh prej ministrisë përkatëse.

Burim Krasniqi – Nënkryetar, unë u mundova ta lexoj raportin, realisht e kam shfletuar komplet. A është raport mbi bazën e të cilit del performanca e komunës së Rahovecit në të ardhmen në vitin 2021, apo është raport i performancës së komunës sepse këtu flitet për të gjitha komunat e Kosovës. Ne jemi duke diskutuar një raport që më shumë ma lë përshtypjen e ministrisë të Pushtetit Lokal sesa raport i performancës. Nuk ka asgjë për komunën e Rahovecit, nuk është asnjë rresht. Këtu flitet për komunat e Kosovës.

Nënkryetari – Në pjesën e parë është e vertetë ajo që thotë Burimi, ndërsa në pjesën tjetër tek përmbajta të fushat e raportimit edhe të treguesit tregojnë performancën. Është obligim ligjor që ky raport të kalohet përmes kuvendit, asgjë më tepër. Për fushat e raportimit është një grup punues, e kemi Skenderin këtu në mungesë të koordinatorës mund t'ju jap informata më tepër.

Rasim Fazliu – Faleminderit kryesues. Desha të ndalem te fushat, mesiguri është ndonjë lëshim. Këtu shkruan fusha 16 – (Përfaqësimi gjinor), pastaj në faqen tjetër e kemi përsëri fusha 16 – (Arsimi parauniversitar). Dy fusha me të njëjtin numër.


Burim Krasniqi – Meqenëse Skenderi qenka pjesë e grupit punues, a mund ta shpjegoj se a është dokument mbi bazën e të cilit bëhet matja e performancës të komunave, në këtë rast komunës së Rahovecit që i vie dikur më vonë raporti i performancës apo çka është? Sepse kjo është e përgjithshme dhe flet për të gjitha komunat e Kosovës.

Skender Hamza – Atëherë përshëndetje për të gjithë të pranishmit. Burim, ky raport është raport i performancës komunale për vitin 2021. Është raport që dorëzohet prej ministrisë dhe duhet patjetër të kalojë përmes kuvendit sepse është obligim ligjor. Ky nuk është raport i veçantë veq për Rahovecin, këtu janë të gjitha komunat që bëjnë pjesë në performancë.

Burim Krasniqi – Kryesues, nëse ekziston mundësia që në seancat e radhës kur të vie materiali, rekomandimet e KPF-së të jenë të bashkangjitura.

Kryesuesi – Faleminderit. Dikush tjetër diçka?... Nëse jo, atëherë përfundoi edhe rendi i ditës, rrjedhimisht edhe seanca e rregullt për sot. Deri në seancën tjetër, mirupafshim.

Procesmbajtësi:


Albion Krasniqi

